

SALOUF: premiera digl film «Patricia Scarpatetti – mamma per 36 uffants»

## Tranter la realitad ed igls plascheirs

**pb.** Venderde proxim allas 20.00 è an sala polivalenta a Salouf la premiera digl film dad RTR «Patricia Scarpatetti – mamma per 36 uffants». En film tgi Paula Nay ò realisò igl aton passo cun esser stada dus emdas a Honduras. Ena analisa digl film ord vista dall'autoura.

Digl reminent collaborescha er l'Uniun da donnas Salouf tar la premiera digl film da venderde proxim. D'ena vart cun ambeleur e dar ena buna atmosfera alla premiera e da l'otra vart cun vender differens products ed igl retgav vo an favour dall'instituziun da Patricia Scarpatetti «Yo quiero ser...» an Honduras. Las donnas fon dus furns pang. A partair dallas 17.30 ins dastga tigl pastregl an mez vischnanca vurdar tiers ad ellas ved la lavour.

Naturalmaintg ins so er gustar igl pang e chegl cun ena bunga soppa da giotta tgi vign sarveida an sala polivalenta dallas 18.30–19.30. I suonda igl film e siva dattigl en aperitiv sen piazza da scola. Dasperas ò l'Uniun da donnas Salouf preparò dulstschems da Nadal tgi ins so cumprar per sustignair la tgesa d'unfants a Honduras.

### An strètga collaboraziun cun Patricia Scarpatetti

Scu è Paula Nay ansomma neida sen l'ideia da realisar en film cun la manadra dalla tgesa d'unfants «Yo quiero ser...» a Honduras? «Ia persequitesch gio siva dall'antschatta Patricia Scarpatetti ed igl sies project cun igls unfants a Honduras. Ia va er adegna puspe ligia igls artetgels surlonder ainten la Pagina da Surmeir», dei l'autoura. Er RTR vegia adegna puspe fatg contribuziuns cun la donna da Cunter durant las sias vacanzas an Svizra. Ed ella vegia er gia meraviglias scu tgi la tgesa d'unfants funcziunga e tge tgi mutivescha la manadra da s'angascher de per de per tants unfants tgi on per part gia istorgias fitg tragicas.

Igl pi ampren seia ella s'antupada cun Patricia Scarpatetti durant las sias vacanzas agl Grischnun. Lò vegia ella descretg igl mintgade a Honduras, uscheia tgi ella vegia survagnia ena ampren impressiun. Pinavant seia ella s'antupada cun ena voluntaria tgi seia stada a Honduras per uscheia survagnair en'otra vista. «Sen fundamaint da chellas impressiuns vaia alloura fatg en concept per la realisaziun digl film. A Honduras vo dantant pac tenor plan, uscheia tgi ia va stuia reager spontanmaintg ed adegna puspe adattar igl concept e la dramaturgia digl film», ò declarò Paula Nay.



Cun ella esser suletta sainza team seia la tgossa stada pi discreta ed uscheia las scenas cun igls unfants pi autenticas.

Vetiers niva anc igl fatg, tgi per l'autoura ègl sto igl ampren film dad ena mes'oura. Pinavant era ella bel suletta: scu schurnalista, donna da camera e da tung e scu reschissoura. «Chegl dava en tant en squitsch. Ia era gliunsch d'event e veva nign support tecnic e saveva tgi stoptga neir a freida suletta», rachinta ella. Dad esser stada suletta vegia pero er gia igl grond avantatg tgi tot seia sto en gnoul pi discret. Igl unfants vegian per part amblido tgi

ella seia ve digl filmar ed uscheia vegia navot l'impressiun dad esser insceno e seia bler pi autentic. E cun esser suletta sen viadi, spargna chegl er igls costs.

### Las sias impressiuns personalas

Cun igl viadi a Honduras, la dimora a lò e la realisaziun digl film, ò Paula Nay er survagnia bleras impressiuns personalas. Gio cura tgi ella seia sorteida digl auto davant la tgesa d'un-



La tecnica da filmar fascinava naturalmaintg igls unfants dad «Yo quiero ser...» durant la dimora da Paula Nay a Honduras.

fants, seian chels currias adancunter e saglias anturn culiez. Ella seia spert sa santeida bagn. Ella vegia er spert gia l'impressiun tgi tot seia organiso fitg bagn. Igls unfants sa geidan e l'atmosfera seia bunga. Igl ampren sa santiva ella en gnoul sarada aint perchegl tgi la tgesa è circumdada da meirs ed ella na dastgeva betg simplamaintg eir suletta aint igl martgea da San Pedro Sula.

Ella saveva er tgi San Pedro Sula seia egn digls martgeas igls pi privlous digl mond. E perfign las autoritads deian tgi ins duess betg eir scu turist per las veias. Tuttegna tutgiva er chel martgea tar tot ansemen ed ella leva er filmar chel. Lò seia ella adegna stada accompagnada da Patricia Scarpatetti ed ena voluntaria vegia er anc accompagna ellas e vurdo tgi capeta navot. Uscheia seia ella sa santeida dètg franca. Ellas seian alloura er stadas ainten en slum a filmar. Pertge da gidar a chellas famiglias tgi veivan lò ainten baraccas è er ena part dalla lavour da Patricia Scarpatetti. «Cò ègl bagn do muments tgi ia sung davantada pertscherta tgi la Svizra è en pitschen paradis», ò managea Paula Nay.

Schi tge impressiun ò l'autoura digl film gia da Patricia Scarpatetti sezza? Ella vegia quasi per mintga problem ena schliaziun ed ena ferma energieia dalla dumang anfignen la siera. Ella mantigna adegna la ruassevladad, fetscha egn siva gl'oter e tot mecta detaglea - atgnamaintg tipic svizzer. Ena ferma impressiun vegia ella er survagnia dalla pacienztga tgi Patricia vegia cun mintga unfant e cun igl personal e scu tgi ella sa stalegia da dominar tot.

Juan Carlos, igl sies feagl vegia forsa schon privilegis anvers igls oters. El è igl sies feagl adopto. Ella vegia er filmo scu tgi la mamma fò igls pensums cun el. Igl ampren seia el bagn sto en tant s-cheptic anvers la camera. Seia plang e plang sa diso, er ve digl sursilvan tgi Paula Nay discurriva. Juan Carlos seia tgunsch igl sulet unfant tgi discorra rumantsch an Honduras.

### Giudicat personal digl film

Igl film è damais realiso ed ò dumang premiera e vign alloura musso dumengia proxima, igls 17 da december 2017 allas 17.25 sen SRF 1 ed ena repetiziun la sonda igls 23 da december allas 17.10 mademamaintg sen SRF 1.

Alla fegn lessans anc santeir scu tgi l'autoura, Paula Nay sezza è cuntainta cun igl sies agen film e scu tgi ella giuditgescha igl resultat?

«Ia crei tgi igl film detta ena bun'invista agl mintgade ainten la tgesa d'unfants e surtot da Patricia Scarpatetti e sia mutivaziun da s'angascher pigls unfants. Ia va ampruvo da catter la balantscha tranter mussar la realitad tgi è betg adegna schi simpla ed igls plascheirs da Patricia ed igls sies 36 unfants. Ia sper tgi igl film muainta ensatge ainten mintga aspectatoura ed aspectatur e va grond plascheir da dastgier anvidar egn e mintgign alla premiera digl film, igls 15 da december allas 20.00 a Salouf ainten sala polivalenta. Igl film vign alloura emess la dumengia allas 17.25 sen SRF1.

## SPORT

### HOCKEY: Lai/Valbella

## Pac ò mantgea

**G.N.S. Er schi l'equipa surmirana ò alla fegn finala pers cun 4:3 cunter Son Murezza, vess ella aglmanc mirito en punct. Igl ò damai betg lia esser e la 10avla tarada an seria è daventada realitad.**

Derbis on adegna las sias atgnas leschas e savens è uscheia tgi igl team pi debel procura per ena sorpresa. Sen la migra veia da procurar per ena sorpresa era er Lai/Valbella sonda vers seira a Son Murezza. Dei ò la squadra d'Ivo Prorok tignia pitg agls Engiadines e mantgea ò betg bler tgi igls Surmirans turnavan a tgesa cun aglmanc en punct. Son Murezza ò bagn domino la parteida, pero l'effizienzza da transfurmar las schanzas an daples gols ò mantgea. Vetiers è nia tgi Sergio Collet, igl goli da Lai/Valbella ò fatg fegn a l'egna u l'otra cachment tgi igls indigens on gia da far duple tgi quatter gols. Las amprenas 40 minutas èn stadas digl resultat anno angulivadas cun tottas dus equipas signier mintgamai dus gols. Ainten la 12avla minuta è Lai/Valbella ia an avantatg cun 1:0 antras Cédric Cavelti. Tschintg minutas pi tard è dantant reuschia agl team da tgesa da far igl 1:1. Siva 22 minutas ò Son Murezza fatg igl 2:1 ed er surpiglia siva da chel per en pi lung mument igl cumond segl glatsch. Ainten la 30avla minuta ò danovamaintg Cédric Cavelti gia success e signia igl 2:2 tar igl resultat intermediar siva dus terzs. Ainten la 43avla minuta ò igl anteriour giuieder internaziunal Gian Marco Cramer, fatg igl 3:2 per igls Engiadines. An surdomber ò alloura Son Murezza set minutas pi tard marco igl 4:2. Ad Elias Spörri è reuschia siva 54 minutas da far igl 4:3, tgi è a madem mument er sto igl resultat final.



Jannik Cantieni, igl defensour da Lai/Valbella.

## ECONOMIA

### PIGNOULS DA NADAL

## A tschains u cumprar?



Pigle a tschains igl voss pignoul da Nadal sur las festas e siva igl dez puspe anavos! Ed igl pignoul so crescher anavant ainten l'orticultura. Igl onn proxim è el alloura enpo pi grond e pi lartg. Chegl è ena schliaziun ecologica e persistente.

L'orticultura alpina Schutz a Filisour ò produtgia passa 4000 pignouls ainten tgebels per dar a tschains er chest onn.

La furniziun succeda ainten l'antiera Svizra. Er la restituziun siva Nadal è organisada.

La pi gronda purscheida da pignouls da Nadal tagleas dall'antiera Svizra orientala è pronta a Filisour.

Allas fieras da pignouls da Nadal dalla firma Schutz a Schlaregna, Tavo, Lai e Zermatt dastgez culeir or d'ena gronda schelta igl voss pignoul preferia.

081 410 40 00 u gartencenter@schutzfilisur.ch

Exclusivs èn igls pignouls da Colorado cun guglias blavas tgi foran betg. Els èn carschias compact ed on ena savour ampernevla. Uriundamaintg vignan els digls ots dallas Rocky Mountains (2000-3000 m sur mar).